

百  
柱  
堂  
全  
集

百柱堂全集卷十 乙巳

監利王柏心子濤著

螺洲吟

王子羈宦而思歸也

我所思兮在螺洲下有長江萬里之清流生平濯纓愛此水  
逝將歸築滄江樓東風二月雜香起綠岸芎藭間白芷日光  
射波躍魴鯉金鱗潑潑盡銜尾釣徒招我江之濱削竹爲竿  
垂桂綸烹魴噲鯉獻翁姥堂前長跪進卮酒諸季起舞歌壽  
康世間牲鼎復何有

螺洲何渺緜我有下溪田垂楊覆陌搖晴煙田翁叱犢桃花

邊欣然向我語曷不讀農書我媿語遊宦未把耒與耨方今  
國計勞司農度支正賴租與庸男兒屨金曳紫不能贊奇策  
敢惜泥塗衣襪襍

螺洲遙接洞庭曲微風吹波漾輕縠江南窮窵多青山仰看  
黛色浮天綠日華晚汎明霞紅化作萬朶金芙蓉倒影插江  
若可采一一蕩漾澄波中我家高樓臨江開浮動不異金銀  
臺方壺員嶠在咫尺海客豈得誇蓬萊疾歸奇景可攬結無  
爲人闢車前埃

相如棄武騎子雲甘執戟仕止豈有常各從性所適朝廷謙  
讓守恭儉人罷巡遊卻封禪金泥玉檢不煩陳子虛上林何

用獻詞賦徒誇冠古才不如謝病歸去來黃鸝青春向人勸  
且飲美酒林花開

鳳闕峩峩紫霄起鶴蓋朱輪若流水相逢大道黃塵中盡是  
四方遊宦子嚴徐著籍金馬門公孫主父皆貴臣何人不致  
要路津誰知汲長孺默默歎積薪亦有張長公拙宦悲沈淪  
祥鸞瑞鷲紫庭舞九天桐花照毛羽黃鸝但樂江海遊萬里  
青天白高舉

明月上天復入地昨日芳華今日悴五侯七貴同輕塵不如  
載酒滄江醉江邊故人多俊遊問我何日歸螺洲東門帳飲  
會當發先遣飛書報白鷗

洲前鬪鴨開始自赤烏時

三國吳都昌侯孫慮置

上有白馬磯謫仙於

此吟珠輝

太白訪裴侍御登白馬磯賦詩所謂亂流若電轉舉權揚珠輝者也

雄豪意氣今已

矣詞客風流竟安在悠悠萬事馳颯輪惟有清江長不改玉壺有酒君不傾只坐浮榮誤此生千年萬古江邊月笑爾生前身後名

弱齡負奇尚壯盛繆千祿晚爲西曹郎城且低頭讀萬棘填其胸鬚毛漸凋綠軒義巢燧若轉轂日月飛光爍膏燭百年鐘鼎空雲煙何不脂車返林谷君不見董生閉戶窮天人禮樂河汾道自新典籍彌縫吾有志何辭殘闕守遺文

都門謁鄉祠見茶陵應山二公像而無江陵慨然久之歸當

羣寄配廟食於不朽焉卽用前韻東夔臣宮允以堅此諾  
古云不婚宦情欲失大半我意殊未然仕宦實堪歎績錦衣  
廟犧文采詎足玩百年視組珪何異浮雲散惟有豪傑流名  
與金石伴緬昔江陵相偉抱慕爽旦攘狄予齊桓赫矣春秋  
案籌策運廟堂九塞坐馘亂不聞奉遺容再拜肅沐盥鄙儒  
獵崇班論高步何緩金紫徒紛綸文武孰綜貫負鼎安國家  
能不愧庸僕安得起斯人籌邊拯塗炭遂令千年來寂寞黃  
金館歸往摹其像擷蘋澗初暖列之李與楊朗若三英粲  
元夕雪

閉門九衢裏臥雪似袁安只覺堦除曉不知鐙火闌笙歌沈

玉管巷陌散金鞍正有還山夢因風躡素鸞

蔡臣宮允申章贈別賦此奉酬

白也始應詔邂逅逢季真三歎誦所作驚呼謫仙人解龜相對飲道合情益親詞客邁知己快若凌青雲郭侯今賀監譽我何津津申章復駱驛惜我歸江濱中天耀白日浩浩長安春英賢奮嘉會高舉攀星辰愚者處冗散姓字安足論當途孰顧問棄之若埃塵蕭然獨去國誰帳東都門夫子匪汎愛高義逾等倫歧路訂後約涕下同沾巾倘乞鏡湖水無忘青

山鄰

乙巳正月廿四日展雲太史招同袖石符農叔起筠仙醮集

寓齋對雪有作

長安盛絲管召客誇侯鯖豈知集俊侶四座高談清主人金  
閨彥韡萼何光榮中心敬愛客穆羽嚶其鳴初筵及暇日逸  
興皆縱橫行爵未及半飛雪皓已盈流光助妍景委潔輝前  
楹噉然念抽秘遠慕梁園英諸君振文藻大雅追西京天門  
詆蕩蕩帝道逢休明方當翼日月金石流英聲樹立在宏  
達詞翰何足名願予實疏拙將返山中耕臨觴眷後會浮雲  
難合併離居在俛仰能不懷屏營

雪中攜荇農訪伯韓侍御不值

雪中清興發起躡帝城埃言訪烏臺客同披鶴筆來遇難



歌蔓草訊欲折疏梅何似剡溪畔空然舉權回

葉澗臣舍人新得韓蘄王翠微亭題名碑拓本云越僧所寄也屬題其後

君臣定議割淮北三字奇冤爭不得紅羅散盡岳家軍惟有  
韓家獨歎息金山廟鼓空如雷背崖兵精安用哉權臣在內  
大將死何不騎驢歸去來翠微亭擬池州亭題詩人去悲月  
明佳兒磨崖字如斗可惜燕然勒銘手愁來獨向闌干倚白  
馬忠魂怒濤起五國城遙幾千里一角殘山誰忍視傷心淚  
墮西湖水

晚過西掖

金闕抗崢嶸形霞麗晚晴御溝初拂燕官樹未藏鶯朝籍慚  
時輩年芳滯上京車雷暮何疾浩浩作春聲

春木翁適齊安賦此奉懷

老病逢春減東爲赤壁遊故人勞折簡吾道任扁舟落落浮  
生計茫茫絕學憂一身文獻在珍重繫千秋

寄懷鳧鄉觀察

詞林尊老鳳門館盛登龍人物三朝志風流四海宗養空恆  
嘯詠繕性得從容信美黃州地天留晚福供

寄陳子宣公子

讀書五行下射策萬言工人見真龍走我知凡馬空連牀憶

京國馨膳對春風傳笏非難事家承孝與忠

園林

燕地園林少鶯花二月稀不成陶暇日頻覺換春衣絲管多  
如海軒車驚若飛輦紅塵十丈何處蹋芳菲

寄九香參軍

西曹騎馬客塵土日沾衣羨爾梁園醉鶯囀花亂飛遙憐良  
會隔各悵宦情微近得沙鷗訊何時返釣磯

潤臣舍人出示山陽潘四農孝廉所書詩冊時潘歿已三載  
矣爲賦詩弔之

山陽一老殊絕倫道高自比渭與莘可憐槁馘死歸下明月

但照空山墳松寥昔年道潘叟四海論交最低首殷勤吾鄉  
葉舍人北面退之等北斗冊中遺墨如琳瑯對之涕下綠纓  
流帥說今人棄如土舍人風義高千秋我生不識四農子地  
下松寥長已矣奇士人間不可逢嗚呼長劍埋雙龍

松寥謂建寧張

亨甫也

曲阜孔五繡山屬題畫龍

葛陂之杖騰九淵池中赤鯉能升天應龍何爲困泥淖至今  
未俗輕高賢魯國男子孔文舉秕糠塵世笑下土往將謁帝  
朝天關自憑尺木致風雨浮雲洋洋從東來誅蕩九扇天門  
開羲和日車待挽轡天田尙乏行雨才排空御氣不得息目

瞻兩角起入極寄言蝦蟇莫相嘲看爾青天飛霹靂

尺五莊餞春圖爲繡山題

圖中潘四農張亨甫湯海秋先後下世矣

帝城詞客會煙蘿太息鶯花委逝波白日飛騰驚少壯黃鑪  
容易隔山河空思吸景雲螭駕且往提壺谷鳥歌獨立東風  
感陳迹萋萋芳草奈愁何

明孝定李太后畫像在長椿寺

慈寧尙憶前朝事長樂宮中位號加能定委裘隆上宰親提  
冒絮訓官家眞靈位業禪天證寶相莊嚴佛國華劫火昆池  
都換盡香臺猶闕妙蓮花

題青松紅杏卷

拙公和尚照也多國初諸公題句

縹緲青溝十八盤峰頭卓錫倚雲看  
春來何處無松杏不見彌天釋道安

遠公社裏多詞客諸老風流二百年  
詩卷長留春又去海棠紅雪寺門前

花之寺看海棠

富貴華嚴海雲霞杜曲天春濃翻欲困韻勝故多妍  
俊賞金鞍簇清歡玉盃傳輕陰長願護獨爲此花憐

偕潤臣舍人登龍樹寺樓

城南夕照倚僧樓  
浩浩川原氣欲浮  
三輔雲連山海塞  
九門花發帝王州  
曉鶯解勸風前醉  
鳴鶴還宜日下酬  
好待葭蘆煙水闊  
相攜仙侶更同舟

過玉簫橋作

閣道分天漢  
宮亭俯翠微  
鶴從三島下  
鷗傍五雲飛  
荇蔓榮風弱  
蒲牙得雨肥  
倚闌蓬閣近  
延俵愴忘歸

壽梅丈伯言六十

國初以來盛文苑  
商邱甯都相繼馳  
桐城侍郎稍後出  
紹明古訓遵莊馗  
惜抱受之晚  
屹屹獨造柔澹刊  
支離配林惡  
池先有事弟子得  
翁宏其施翁家  
達人亦不少  
圖緯奧學陳軒

義數傳至翁擴文固位不配才郎署卑往往覃思出宙合就  
之不異渴與飢厥初敷言首貫道用兩政典光民彝粵若姚  
妣逮鄒魯大文經緯苞兩儀董賈遷雄導厥委乃始專鶩於  
文詞橫翔捷出稍一變其視六藝猶未歧有唐韓子約經旨  
攘斥佛老固藩籬功施兩宋久弗替仁義不患邪說滴嗟乎  
後來體益裂決防潰岸不可治摭摭章句競鉤鈇不者浮冶  
如繁枝破碎大義騁小辨百家日出言猶卮雕刻眾巧等技  
藝翁起慨然一掃之經綸訓典翼大道獎述忠孝昭穹碑上  
者承明石渠彥下至山林文學師見翁述作盡斂手旋其面  
目慚測蠡斯文統繫有專屬此論至公吾何私翁今矍鑠始



六十健筆戰走千熊罷海棠初紅酒初熟介翁壽康福履綬  
小子舉觴述作者詞林萬羽徒爾爲韓歐往矣曠千載餘子  
瑣瑣皆庶支天其以翁續文統願翁永保黃髮期

熊太學殺賊歌

太學名之吳黃安人嘉慶二年妖賊齊王氏由豫之大勝  
關掠山花鎮而東徧黃安北境太學曰是可截而殲也散  
金募士得壯丁千人邀之土脊嶺賊不敢進會大雷雨賊  
悉眾踰崖太學格鬪力不敵見執誘之降晉不絕口賊鬪  
之焚其居竟拔營去不復東從太學死者三百餘人其嫂  
顏及劉茂才二女與焉

襄滸女子如飛蓬申陽進掠三關東仙花鎮北火不絕太學  
投袂當其衝死士千人氣獨整白栲進斷土脊嶺老羆臥道  
羣賊驚頓兵山下未敢騁大雨如注霹靂摧賊趨間道踰高  
崖太學格鬪遂見執賊語壯士且勿哀嘆血罵賊竟鬪死殺  
賊誓當爲厲鬼從而死者三百人捐軀復有烈女子賊轉而  
北城卒完一死遂障江漢安有詔褒卹許廟食見者感激忠  
義肝我聞民屯足倚仗不煩符檄與轉餉敢戰往往挫賊鋒  
統之但須膽智將君不見前年逆夷犯廣州飛矢雨射高城  
樓村丁圍之南山口夷酋膽落不敢扭戴頭哭向海中走  
口占送叔起還鍾離

抱玉徒成泣出關空復歌金臺無處覓殘日渡滹沱  
歸逐南飛翼臨淮路渺漫清流關上望直北是長安

贈魏默深同年

陰陽幹元化二曜運不休天生俊傑士以解蒼生憂功不濟  
三才納溝壑所羞大禹殷無成乘櫟莫九州宣父七十說皇  
皇走道周夷吾及墨翟各欲拯橫流洗耳棄聖世果哉巢與  
由

魏子出南岳本自濟時人曾浮大瀛海波濤浩無垠空思願  
榮扇未清東南塵歸來更著書辨口馳驅輪苦心豈好辨念  
欲獻丹宸宣室未見召負鼎猶逡巡大賢必虎變風雲終有

神吹垢發軒帝鈞璜感周文儀鳳今則至况逢重華君

對雨有作

法曹束帶苦晝永簿書困人意不騁驅車疾出公府門崢嶸  
突見西山影娟娟白雲山之中無心出岫遊太空須臾布景  
被六合霹靂聲中飛白龍歸來垂簾看驟雨寂然雲散無處  
所雷收雨止龍亦歸颯颯清風滿庭戶世間萬事無定形浮  
雲變化還杳冥惟有西山不改色依舊芙蓉天際青

玉堂歸安圖爲展雲同年題

詞臣青鏤管仙史紫瓊簫去結鴛鴦社歸題駟馬橋蓮從宮  
炬撒花傍鏡臺嬌憶石金鑿直清寒異此宵

百兩韓侯娶清尊顯父筵秦樓對朝日漢殿隔甘泉香月梅  
花嶺紅雲荔子天人生誇畫錦騎鳳况翩翩

綺幌調絃夕華燈卻扇時佐紉金匱籍索和玉臺詩香夢雙  
棲翼新圓十樣眉坐來渾不辨月照兩瓊枝

已許聯雙璧仍看侍五雲朝衣勞共檢法醞喜同分粉署宜  
才子金門有細君煩將蘭麝氣更助馬班薰

渝關望海歌贈孔五繡山

孔侯獻策不得意匹馬東度臨渝關盧龍一氣走長白雄城  
俯扼山海間下馬卻問老兵語前朝戰鏃半在土千帳轅門  
環豹螭萬年王氣衛龍虎酒酣更上澄海樓茫茫元氣空中

浮窮髮以外不可辨采芝何處仙人洲遙山突兀映天黑影  
過乃是巨鼈脊火輪飛上扶桑枝關門倒射金霞色樓頭颯  
颯天風冷寒潮濺袂酒力醒歸來仍過長安門九陌依然墮  
塵境昔觀日出天門峰俯視海上金銀宮壯遊前後略相敵  
兩見雲海開心胸蓬萊仙骨似君寡御風毛車不可假弱水  
隔斷三神山可惜低頭尙騎馬我生未作滄海行坐令塵土  
汚長纓九垓倘結盧敖伴往采芙蓉朝玉京

游龍杖歌奉和蕭山相國

相國階前有蓼花高七尺餘其堅可杖也遂製杖焉且作

歌徵和

蒼龍之精遊天衢化爲小草當庭隅葛陂擲杖天然符我公  
喜之製爲杖鏗然爪甲紅珊瑚蒼茫秋思來江湖江湖遼遠  
豈公意曷不坐論唐與虞異人卷舒世莫測大賢有時貌若  
愚昔者變化灑霖雨今者蟠屈爲根株懷仁輔義進朔 主  
退以名節倡士夫龍德潛見各有濟或出或處與道俱亦知  
中朝眷蕭傅夢寐安得忘訂謨懸車有義鑒止足况今羣賢  
多鳳梧番番黃髮退秉德于國元氣潛相扶上尊養牛日有  
給從容自異山澤臞五帝輔臣盡眉壽風后天老神仙徒杖  
兮幸從我公後歲月亦若天上榆不然孔光賜靈壽台袞終  
始無崎嶇平生名德末路淪似龍非龍久當殊乃知我公真

大儒杖兮陳力勿拳曲礪礪多節公所需

蓮花橋祇飲詩爲李干之賦

美人隔秋水望望天之涯秋水不可極迤邐芙蓉花花開亦  
何麗照水如丹霞長虹飲天半仙者回雲車下與湘中客結  
佩零瑤華我欲往從之道路幽且遐塵纓久未濯矯首徒咨  
嗟空詠水中沚涼露生蒹葭

昔年散金大殺賊眉間精悍壯士色今來醉臥芙蓉秋巾服  
蕭然成野客丈夫落落栖風塵道與龍螭同詘伸野鳧汀鷺  
自爾汝見慣豈識英雄人

浴鶴吟爲陸東漁賦



東漁畜二鶴甚馴鑿池浴之爲作圖且徵詩

雙鶴何翩翩遠自青田之址丹邱嶺飛飛忽下集所感主人  
賢主人方池潔且清恣汝沐浴光澤生細看毛質若無有青  
天惟見霜雪明時時意得相和鳴引吭宛中緜山笙汝今池  
中物固是神仙骨矯首望煙霄憶別三山月三山縹渺不知  
幾萬里汝行翩翩若尺咫但恐長鯨磨牙巨魚如山蕩海水  
岱輿飄搖不可以托趾汝休往兮江之濱亦勿啄兮滄波鱗  
網罟如織矰繳愁人鵝鵝羣飛盡饕餮遺汝腥腐汨汝眞哉  
汝好毛羽勿爲俗客舞俗客少矜眞狎視徒溷汝汝飛但當  
軼青雲朝紫皇紫皇高居開明堂日月出入懸輝光其中琪

花珠樹不可以億計五色沆漑流瓊漿日夕飲啄棲且翔鳳  
鳳爲大聖鳩扈皆忠良保汝皓質慎汝志往率百鳥鳴鏘鏘  
噫嘻乘軒何寵樊籠何辱茫茫江湖鴈鷺餘粟汝鶴有心不  
能激九皋而上聞何不爲橫絕四海之鴻鵠

張小庵郎中文自言昆季離合之感爲賦四詩貽之

骨肉爲連枝華葉同光榮皓首愛彌摯惟君弟與兄昔別已  
一紀今來聚上京結髮隸仕籍握手皆豪英盍簪豈不盛不  
如我同生欵欵連床夕依依童孺情良會匪人力所感天合  
并

合并信可樂及此涼秋時開軒睇草木露下發華滋感彼同

根生一氣無差池西風何嫋嫋吹我瑤琴絲膠漆自云陸豈  
若填與篋且復盡尊酒無爲遽別離

別離亦何速邛阪五千里高高上造天幽谷下無底古木號  
杜鵑猿嘯夜不止聽者凋朱顏何況遊宦子昔爲軫與徽今  
爲弦與矢衰哀桓山禽永望各揮涕

揮涕勉相慰珍重起與居何用申婉變視彼丹青圖以證  
顏狀道遠情不殊努力樹聲勸課最來王都歡會亦未遠棣  
華仍合附俯瞻滹沱流仰視日月徂但保喬松體何嗟歧路

隅

伯韓侍御出其尊甫韞山先生手書詩卷屬題爲賦五言一

章

仁廟十八載枉矢宵有芒賊起大河北  
羣孽迅掃清巖廊克黨冗滑臺豕突紛披猖濬邑實密邇郭  
外爲寇場賢宰得朱公語民勿憂惶嚴令勒什伍登陴扼其  
吭謀定不返願誓與城存亡賊來亘原野肉薄勢莫當公輒  
手刃之得尸磔諸牆負戶晝夜戰丹血漂池隍賊氣爲之奪  
孤城迄無傷大軍覆賊巢獻捷俘檻羊公不上功狀亦未騰  
薦章事成效魯連冥鴻天際翔聞公乘城日陳薪積於堂願  
謂家人輩堅坐毋倉皇城破則速焚必與薪俱煬食祿焉避  
難大義何慨慷談笑戮間諜傾貲充餼糧當時微公在賊勢

行益張公功被兩河豈惟障一方功大竟辭爵清白勛諸郎  
令子邦之直繡豸趨雲間挺然見汲魏威鳳鳴朝陽烏虜公  
既沒澹人思不忘名宦請入祀酬公宜烝嘗 詔書報曰可  
歲薦蘋藻芳昔公偶游藝餘事兼詞章書格亦磊落凜凜松  
柏蒼蔡君購諸市以貽令子藏子琦拜受之承袂涕浪浪攜  
卷出示我謂當志末行惟公不朽業大者垂旂常詞翰亦正  
氣鬱勃忠義腸回首大河側際天惟嵩邱此卷與之峙萬古  
凌蒼茫

述慈訓詩爲林香溪孝廉作

孝廉母吳太孺人訓香溪以聖賢之學是可述也故有此

篇

啞啞林間鳥，軋軋機上絲。琅琅空中韻，熒熒燈火輝。勞勞母  
心苦，呼兒前受詞業精。母所喜業荒，母則悲。母喜非金紫，悲  
豈寒與飢。宮牆今釋菜，曷往瞻先師。先師去已久，仁義留其  
規。眾山仰岱宗，百川趨海湄。修學苦不早，何不努力爲。

維昔伯仁母，垂涕語諸子。竊竊計門戶，所見惜不偉。卓哉賢  
母心，迪志在踐履。佳兒遂感奮，覃思究經旨。學成儷馬鄭，貢  
牒冠州里。哀哀堂背護，花落不能俟。追維束髮初，慈訓尙在  
耳。讀書師聖賢，豈羨萬鍾仕。通經非曲儒，端尙乃國士。持此  
慰九原，令名未有已。

熒熒窗前鏡猶似昔年炯痛彼三春暉馳光未能永東逝無  
還波西沒無留景念此淚汎瀾掩卷輒悲哽子其勉終業邁  
往汲修綆迢迢干聖途落落一燈秉希光勤加膏冥照發餘  
頰庶答寒泉思無忘斷機警

題朱韞山司馬詩鈔

嶧陽孤生桐絃之中律呂自從伶倫亡中音莫能譜英英大  
雅才超然復元古但寄清尙心豈爲俗人鼓淫哇何足陳所  
貴緝宮羽一彈元鶴來再奏紫鸞舞泠泠天地間餘音作風  
雨

登陣昔扞賊羸卒皆同仇寇平撫瘡痍剋起趨耕疇崎嶇鋒

鐫間曾不廢吟謳中夜數行淚獨爲蒼生流悲哉北國陷  
鼓前年秋狂鯨怒掉尾突過高城樓重堞非不壯保障誰爲  
謀豈聞緩租賦俾彼民氣休良吏不易得吾思元道州

和邊袖石同年自題齋壁

仙官職業異曹司玉餌雲衣劍陸離軒鶴任翔三島月巢鶴  
多傍萬年枝通明且喜移家近曼倩何嗟索米飢迎得板輿  
人盡羨諺華方耀九秋時

居鄰韋杜感風流心遠吾廬地自幽北極彩雲螭陸麗西山  
華月鳳城秋開門多掩蓬蒿徑野水如環杜若洲賓戲客嘲  
何用答寄言車馬漫相求



曾眺津門滄海東少年驅馬古天雄  
吹臺春老梁王苑良嶽  
雲荒宋代宮往事光陰彈缺裏臥遊山水閉門中  
蓬壺風月  
須千首搖筆今看氣吐虹

陸龍荀鶴忝齊名並轡時時傍帝城  
詞客自推金馬彥釣徒  
終憶白鷗盟梧桐岡上朝陽羽蘿桂山中歲暮情飛伏  
他年  
殊緬邈無忘天末惠瑤瓊

暮望西山

秋色暝逾淨一碧澄穹霄西山起恆代倚天何岵嶷霞彩散  
峰頂垂空如絳綃參差芙蓉華擢秀空中標金翠匪一狀不  
受風飄搖仙人安期生舉手雲中招綵虹若可躡天路當非

造誰能溷埃塏役役多浮囂

題孫忠靖手書詩卷

代

入對平臺出賜劍掃賊秦中疾如電閉關制賊勢有餘樞臣  
日責開關戰開關賊銳不可當霖雨斷道軍無糧樞臣誤公  
公報國公亡明亦隨之亡遺墨零章半殘裂寄與楸枰玩禪  
悅嘯詠空餘漱石心頭願竟灑膏原血竹林金閣多悲風殺  
魄千年化白虹行人立馬潼關道猶聽河聲泣鬼雄

對奕談禪所寄

意也竹林金閣所  
眺覽也皆卷中語

種芝曲題孫少梧先生遺照

達人種芝湘水濱花開爛漫山中春煌煌芝秀未及采天上

日月如飛輪種芝人已歸三島歲歲芝華開自好風木徒傷  
孝子心駐景虛聞蘋蓀草舊德靈根故自奇花開今喜傍彤  
墀太平瑞應歌新曲露浥齊房五色芝

雪聲堂研歌送唐子方廉使之關中

雪聲堂上一片石使君舊從市中得寶之何止三十年四海  
徵題徧詞客昔隨嶺表忠義人今歸岳牧爲良臣遇無顯晦  
道一致昔者屯戍今則伸使君西來謁天子指畫河隍如聚  
米老謀請罷出塞兵侃侃前席九重喜繡衣畫斧行關中使  
君文武多威風整肅憲度理丹筆嶽嶽此研長相從南山盜  
竄北山藪花門雜居况已久往往雄趨凌秦民椎擊黠猾無

不有昔我伏軾三秦遊父老多言他日憂上書誰建郭欽計  
徙戎空懷江統謀法行知恩猛非虐不見武侯與景略迂儒  
寬縱無遠猷大賢擊斷貴除惡五陵三輔原浩穰使君宣風  
持厥綱豈惟煦育比冬日要使威令明秋霜外臺奉法佐  
王國柱後惠文表風力雪聲片石重摩挲不媿蒼然端毅色  
斷指曲爲山陰杜貞女賦

昔截耳今斷指千古貞名兩女子媒灼有成言信義安可諉  
飛鳥不再匹走獸不亂行嗟彼人之披猖何爲敦禮淪三綱  
入門衰經悲歎歔爾父我舅母我姑將荼茹蘗甘如飴寡鵠  
日夜恆單栖指血漉漉尙凝紫獨對瑤琴不能理幽蘭吹斷

同心花三尺枯桐半生死

聽雨樓歌題李寄雲侍御臨黃鶴山樵卷子

蓬蓬濕雲漲空起飛瀑喧  
逐條滿耳不辨風聲復雨聲  
聲都出卷中紙李侯潑墨眞  
宰通勢捲驟雨來山風偶然  
寄興仿黃鶴已覺高臥儕元  
龍昔我扁舟倦行旅年年聽  
慣江湖雨銀鱗跋刺吹圓漚  
白鷺斜飛沒前渚何人結樓  
巖岫間流泉百道鳴潺湲江  
聲壯入洞庭浦雲氣失盡蒼  
梧山未得鵝溪絹一匹又無  
李侯好手筆雲煙萬變不可  
追奇景翻如飛鳥疾披君此  
圖思昔遊天末徑欲挈歸舟  
白螺洲畔聽春雨去築滄江  
萬里樓

白螺洲在徽廬在焉  
有樓曰滄江萬里

平谷山莊歌爲寄雲侍御賦

青松吹風巖壑深  
舍南舍北流泉音  
生平涉想目未歷  
杳然已到盤山陰  
盤山萬疊接天起  
谷口白雲飛不止  
千峰忽斷橫漁梁  
日日雲飛化春水  
小桃臨水紅欲然  
溪柳含穉搖野煙  
波光盡處帶遠綠  
遙見萬頃桑麻田  
敝人得鯉喚沽酒  
叱犢芳原盡農叟  
山川如此真桃源  
此境世間安得有  
玉堂神仙衣繡衣  
年年夢向盤山歸  
盤山舊莊在平谷  
春猿長吟秋鶴飛  
粉墨到眼看不厭  
可惜只向圖中見  
領取宰相當十年  
鄴侯豈可名山戀  
吾曹自是山林人  
只合歸從鄭子真  
布韞青鞵辦已久  
草堂無待北山文

題朱文卿同年紀遊圖冊五首

危機不可上，曠色楓林秋。沙迴月華出，天空江水流。誰詢運租客，獨憶錦袍遊。倚棹自終夕，山猿嘯更愁。

嶺斷天俱豁，川長風任吹。中流一騁望，秀色雙蛾眉。魚復漫云險，龍門無此奇。征帆杳然去，到海卽爲期。

春水泝涇西，句溪連宛溪。明霞川外漲，濕黛鏡中低。灘靜宿沙鷺，山深聞竹雞。連船須載酒，莫惜醉如泥。

琴客控仙鯉，飄然天外峰。道成向何往，留此青芙蓉。更有陵陽子，沿溪釣白龍。遙知共攜手，絕頂臥雲松。

宣州雲木好，無過敬亭山。雨望更奇絕，娟娟垂翠鬢。空明宛

溪水窈窕鏡中間  
瞑坐北樓上  
渾忘飛鳥還

又一首送文卿之官山左

江南江北謫仙才  
更遣題詩江上來  
若過石門思秀句  
秋高海色照徂徠

少鶴農曹幼失母  
其姊爲劉氏婦  
走依之姊新嫠  
又喪厥孤  
覺煢然惟姊與弟而已  
課少鶴誦甚勤  
階有石二姊搗衣  
弟受書恆分據焉  
少鶴官京師時  
時憶童卯事  
不忘也頃  
歸拜墓且省姊  
柳州爲作詩紀其事

弟幼失母走依姊  
姊復嫠居喪其子  
搗練者姊讀書弟  
石苔分掃碧陰底  
弟業不進姊涕洟  
不記母氏劬勞時  
弟聞姊語



悚且泣母亦地下吞聲悲年少含香入華省鳳城秋深夜漏  
永夢中執卷如童年一片砧聲催夢醒有秋之杜生道周零  
丁姊弟猶離憂弟宦京師忽不樂昨得姊書來柳州請急南  
還柳州道焚黃慟哭墓門草錦衣拜姊悲復歡弟作臺郎姊  
未老願姊壽與金石期鞞琴何殊棠棣枝訓勵申申長在耳  
請歌明發鵲鵲詩

藕湖行爲秦澹如公子賦

藕湖澹澹不可極九龍倒影暮煙碧西風拂水蘆花飛點破  
明湖好秋色湖上誰家營墓田道是梁谿司寇阡當日雄文  
播天下只今墓木含風煙紅顏逸才貴公子賦就三都來帝

里松楸丙舍苦難忘夜夜歸心藕湖裏君不見終子雲殿上  
奮舌對白鱗一朝文采動人主高車擁傳長安門又不見員  
半千豪英大集東封年鬻田上書請就試才俊斂手無敵前  
丈夫高步及年少何況德門有餘耀三山縹渺丹霞中琪花  
照耀金銀宮仙人如麻宴帝所往來盡把青芙蓉曷往從之  
十洲畔珊瑚竿燭滄波紅人言司寇有鳳毛唾手自可登雲  
霄不然五噫遂東返歸釣藕湖未爲晚

應州刺史行送鄒子壽泉

鴈門八月塞草白胡鴈南飛暮不息應州刺史乘單車別我  
更出鴈門北飛狐句注雄九邊勅勒川連神武川黃沙北望

香無盡古來戰骨今平田時清亭障不用武朝廷選吏重卓  
魯願聞徭賦寬邊州更遣耕桑變瘠土應州刺史文武才三  
月報最何有哉五臺青擢五苗菴開軒無事多銜杯高歌自  
弔明妃冢射獵或過單于臺落落酒人燕市散君向雲中我  
楚甸鴈門相憶不相見題詩好附南飛鴈

蓉洲老人夢研歌

日華五色射海水仙雲一片海上紫老人捫天割紫雲隨風  
化石滑如綺夢研得研何分明後先元感通精靈海雲飛來  
不可斷雲氣下繞弧南星人間三絕蓉洲叟陵陽仙者乃其  
友夢中老人太乙精郭錦江花格君手請攜此研天都峰浩

浩雲海蟠心胸仰天濡墨一揮灑散作下界濤與風竒才跌宕駭眞宰石骨蒼然想丰采支機不用浮天河大笑袖中有東海

以楚僧鐵舟畫山水障子贈劍潭農曹

西風振林颯已暮隔溪遙見夕陽度尋山先作沿溪行白雲遮斷蒼山路楚僧筆力追石田紙上颯颯生秋煙飛來樵唱墮空谷何處鐘聲搖遠天我持此幅壁間挂到眼青山意先快山中桂樹招我歸歸去看山何用畫君今栖栖郎署間夢裏家山久未還不如虛堂坐對此請君看畫兼看山

松菊四章題家恬庵年丈小照

百本堂全集 卷一  
三十一  
鷹隼橫厲摧鸞皇眾女謠詠蛾眉傷千金贖背不可得陷身  
羅網投南荒碧雞金戶非故鄉悠悠江漢阻且長故園松菊  
在何所攬衣夜起多徬徨不覺涕泗沾衣裳

沈思令人老安用多繁憂傳險山中有胥靡夷吾亦是堂阜  
囚聖賢屯厄古來有踟躕天高地復厚三百年來忠孝家失  
身罪罟非其咎松風在耳菊在手何必只飲故鄉酒

百舍重繭有孝子天南甯親走萬里相持慟哭蠻煙裏殊方  
聚觀悲且喜佳兒歸看長安花走馬聲名一日起漢柱應題  
京兆郎官袍初拜尙方綺泥金駱驛天南馳折屐如破淮淝  
師鬢花解笑鳥解歌殊方瘴癘今已和醉矣遑用恤其它

日月亦何朗八紘亦何寬  
赦書八道出長安  
天門會放金雞  
竿齊相脫膠  
贖越石夜郎  
江上釋李白  
父老爭迎  
萬里客  
黃菊青松繞舊宅  
卻看松菊如當年  
鬚眉已帶點蒼色

賜對行與梅生太史言別

天垂五緯山出雲  
伊陟呂伋皆世臣  
起家早膺不次遇  
報國必屬非常人  
三吳開府名父子  
二十登朝柱下史  
才雄豈止凌風騷  
年少尤能識治體  
昨者賜對明光宮  
銀臺門啟趨羣龍  
仙仗日高未下殿  
君王顧問何從容  
翩然忽擢江之東  
鄴侯甦往名山中  
逡巡避寵未易測  
誰知高蹈非冥鴻  
豫章根柢鬱盤魄  
龍虎變化在山澤  
深沈貴養文武才  
澹泊彌堅搢

荷力君不見抱蛟持兕終爲災天下大計兵與財網維振舉  
在運掌管蕭韓白安在哉金堂玉戶集燕雀瑠鞍寶勒駝驚  
駘子嘗顧我多慨慷世事感激忠義腸薊門十月天雨霜桑  
乾水深川無梁朔風振野飛雪雱欲別不別同徬徨吳門回  
首瞻絳霄夢中魏闕殊遙遙救時姚崇待作輔內相陸贄行  
歸朝我往垂綸任散髮願子莫厭簪與笏殷高周宣望我

皇早起東山扶日月

長歌贈別孫子芝房

嶧桐蹶根劍躍水人間失卻浮邱子後來健者復有誰眼中  
無過孫與李李子倜儻龍爲媒孫郎自是珪璋材屹然詞雄

復張楚青天驟覺生風雷嗟虜大雅久不作崢嶸日下浮邱

閣霜臺

謂伯韓侍御

鳳池

謂潤臣舍人

多俊英晚得孫李益恢廓回瀾

障川竄不勞太息六義江河滔洪鐘一振細響革當時頗受  
羣兒嘲我生才薄慙潦倒自失浮邱意枯槁喜逢二俊來湘  
東不遣風駭委蔓草滄海年來斂祆彗耽耽鮫蜃非無事下  
士猶聞陳臯言公卿得不進至計李子才略贊皇儕孫郎感  
激賈生涕諷論均通忠孝心詞臣獻納自古義李也覽出孫  
也留予亦歸乘江上舟枯桑天風九河凍國門帳飲走相送  
觚稜日落浮雲生野鶴裊裊別丹鳳鳳飛直傍九天闕回首  
森然天廟骨豈無雅頌流筦弦况有精忱通日月侍御舍人



在朝宁諸公努力復元古登車獨出國西門蓬蒿之人何足  
數不見浮邱淚如雨

橋亭卦硯歌爲劉寬夫侍御賦

宋家忠厚三百祀食薇安得無義士六十堂堂忠烈人肯媿  
壁間小女子衣冠濟濟燕都來江南痛哭無人才瑕呂飴甥  
不可得夢炎文海安用哉卻聘書成足千古絕粒從容報故  
主賣卜之研留人間對之便是首陽土當年高餓憫忠寺侍  
御得研卽其地忠良先後時不同昔作夷齊今汲魏依然片  
石無磷溜奮髯抵几餘英女虛堂恐有呼聲出來視批鱗草

疏時

柱後鐵冠行寄陳頌南給諫

柱後鐵冠氣嶽嶽捧簡清風動臺閣擊姦一疏天下聞殿前  
迴立霜中鶚直節未受朝廷褒紛紛法令如牛毛公卿卷舌  
不得救蕭然去國甘蓬蒿寘犯萬乘威莫望有司議君不見  
樊檻小臣終得生黯也空爭刀筆吏

道中寄伯韓侍御

昔者高三直吁嗟氣不伸何辭鍛鸞羽猶欲犯龍鱗日月終  
無窮朝廷尙有人臺端一回首落落見霜筠

潤臣舍人出小照屬題

昔聖不可作後顧千萬年茫茫八紘內以我當其間亡羊競

末學愚者偷自延悲哉仁與義蘊廬同棄捐千鈞屬一縷豈不在予肩

目若營四海高志亦何邈由來達士模所懷在卓犖博習綜藝文昭質葆端慤大圭無匿瑕純色不尙駁遙遙昭曠塗庶以紹正學

吾子秉至性內行何其淳古義篤師友深鑒辨人倫潛析濂洛理上觀游夏文大儒方寸內宙合同彌綸用之足康乂不見莘野民

子居鳳凰城我往大江北相望邈難親風雨恨晨夕撫絃彈宮商同聲永不隔修道無近榮崇德各努力無令七尺軀仰

慚視與息

雄縣橋

虹飲垂霄下螭盤列柱扶天光浮日月海色帶津沽戲唱江  
南似漚波蒨北無瓦橋關不用車軌達皇都

定州對月憶都門諸知己

窈窕中山月銜杯只獨看有懷臨永路終夜望長安江上尋  
鴻鵠天邊隔鳳鸞帝鄉渺何所極北最漫漫

過白溝河

遼宋界河也

飛捷三關下班師萬乘回千年嗚咽水長繞病龍臺

眞定

百本堂白集 卷一  
岳干霄起溥沲動地趨塵沙連鉅鹿風雪下飛孤陣尙留  
兵勢人誰得寶符戰衝河朔地扼要此雄都

登真定大悲閣觀大佛

我登大悲閣心目眩震掉巍巍化人城傳自開皇造隋文盛  
節儉亦復事虛耗範金肖巨佛實爲大業導後來成德軍安  
史轍復蹈武俊旣驍雄庭湊最克暴殺人日流血弄兵抗明  
詔不聞大雄力悲愍覺忠孝帝者遏亂萌豈必隆象教浩劫  
何茫茫琳宮尙照耀崇侈良可哀臨風一悲嘯

襄國

磊落能談史梟雄復善兵居然笑曹馬亦不作韓彭疑冢猶

多詐排牆尙忌名右侯如未遇嗟爾竟何成

叢臺行

邯鄲古道黃蒿沒老狐夜嘯叢臺月家家兒女解彈箏此地  
由來歌舞窟北枕滹沱南倚漳建國山東趙最强襄主寶符  
終取代武靈胡服遂開疆私門漸盛公家逼豪舉堂前唯食  
客窮巷猶多毛薛才美人半在平原宅著書誰惜老虞卿好  
事空談趙括兵乍許置關通上黨已聞銳士盡長平英風獨  
激魯連子攘袂不辭蹈海死終憑寸舌卻秦軍勝也安知天  
下士濁世翩翩未絕倫公子殊慙謀國臣莫向趙州更澆酒  
買絲當繡信陵君

磁州道中

沃壤龍鱗列征軺馬足遲牛羊散初旭鴈鷺喜流澌刻石同  
樊惠穿渠比芍陂誰籌三輔利溝洫此堪師

鄴都引

魏王按劍氣如虎鄴下雄城開霸府健者已無袁本初大兒  
竟殺孔文舉下令遂築三高臺勢與雲日同崔嵬宴酣大陳  
歌舞伎父子並擅文章才好雄有力移九鼎惜不東回崦嶼  
景臺上美人夢未殘風吹西陵松柏冷威略驕豪不可留石  
氏高氏皆荒邱千年人事誰能待惟見橫天漳水流

銅雀伎

可憐銅雀伎日夜望陵臺生小但歌舞安知霜露哀一朝恩  
寵盡粉黛成寒灰東下漳河水滔滔更不回

湯陰謁岳忠武王祠

精忠天日月血戰宋山河父老中原隔英靈故里多君恩杜  
郵劍臣志魯陽戈地下宗留守相逢慟若何

孝忠嗟未遇天遣事孱王越僂大夫種齊誅斛律光拊膺兩  
河路灑血六橋旁毅魄應來往雲車下此堂

涉淇水憶梅生芝房潤臣袖石諸子

駟驪逝駸駸亂流及始旦沙石皓已明風水勢相激崢嶸太  
行雄橫壓趙魏半飛影墮中流風煙倏變亂我無修竹竿臨



淵忽生歎釣魴將誰貽良友各分散淇水何悠悠悠悠尙有  
岸徘徊我所思茫茫獨無畔自非川上冰憂來孰能泮

望太行

紫塞遙臨北黃河直走東高爲天下脊蟠作日邊雄積雪凌  
朝旭回巒入太空苦寒歌樂府莽莽憶曹公

滑臺

白馬大河口雄城古滑臺曹滕惟此蔽梁楚自茲開太武實  
強敵元護豈將才狼居封草草棄甲竟悲哉

其二 憶揚忠武平賊事

天使開邕管金吾拔鄆城昔聞擒劇盜于此下神兵壘沒荒

榛路成留大樹名髯將軍不作蜃鱷尙縱橫

滎澤渡河

南北中原割渺茫奔沙入夜走雷碾星連遠火浮滎澤風卷  
春雲下太行幾見河渠修漢代頻聞澤洞警陶唐水衡不繼  
司農匱使者何繇答廟堂

延津大風

朝聞滎澤凍改轍渡大梁駕言古酸棗清晨犯嚴霜朔風嘯  
廣野噫氣盛土囊驚沙蕩白日惟見千里黃鷲鳥匿不出野  
獸走遁賊四顧罕墟落寥闊如龍荒猶疑楚漢鬪猛士赴敵  
場羈人憚凜冽歲暮懷感傷扶搖倦已久何事排雲闕願控

雙黃鶴整翮還故鄉

渡河至大梁

昔聞決白馬可以水大梁自從七國來知歷幾滄桑哀哉中  
牟潰濁浪滔天黃生民什九沒城郭半淪亡沃壤變沙磧耕  
犁不得將如何行隄使昧彼先事防蟻穴一不慎焚玉徒奔  
忙我從延津渡翩然一葦杭層冰白顛顛若木升朝陽精曜  
燦六合龍燭銜天間既欣橫流斂益駭靈澤長古者帝舜世  
瑞應浮榮光胼胝任姒后不復憂懷襄恭聞 至仁主咨傲  
猶虞唐羽淵弗輕貸天威肅廟堂河伯慎汝職曷以翊我

皇

大梁詠信陵君

英英魏公子于國爲宗臣虛己攬俊傑顧盼愷暴秦功高反  
見忌鬱鬱喪厥身感激龍顏主守冢禁樵薪吁嗟百代後豈  
無肺腑親仗鉞重推轂無策清風塵智疏愚者進自古多酸  
辛我過大梁野不見信陵墳醅酒向何處封樹杳無存空然  
對落日竝想望夷門

汴洲

賓客文章掃地無鴈池波冷兔園蕪孝王臺下沙如海匹馬  
蕭蕭過汴都

隋隄殘柳送征輪不見當年粉黛人汴水淒涼餘恨在瓊花

落盡廣陵春

外險黃河內險兵宋家憑此衛都城如何一代興王略不取

關中作帝京

宋太祖初欲都長安聞太宗言而止

莽莽眞成萬里沙可憐白骨委龍蛇行人愁向繁臺過不爲  
飄零怨夢華

朱仙鎮謁岳祠

中原父老拜焚香慟哭班師百戰場二帝冰霜淪毳幕諸陵  
日月限戎疆臣能再造唐靈武主異中興夏少康鐵騎虛堂  
風雨夕猶聞捲甲大河旁

行經新鄭林花盡開

徑曲抱岡斜村村桃李花飛來渾是雪空處盡成霞上日饒  
芳淑何人借麗華便思攜美醞隨意坐平沙

東里

停驂古東里云有國子祠棠甘不忍伐遺愛復在茲惜哉相  
小國未克宏厥施遂令管夷吾獨稱天下奇敷政在糾慢惠  
人嗣者誰後來寬與猛相道猶相師伊昔處卑冗碌碌未見  
知薦賢受上賞推轂功不尸嗚呼百世下不聞祀子皮

渡潁水

南行涉潁水清可濯緇塵居卜楚簷尹歸稱堯外臣煙明沙  
渺渺湍淺石粼粼何謝湘江畔苔磯理釣緝

獲嘉道中

入衛已春仲踰河過獲嘉煙低縈弱草風起約飛花官道多  
依堠征輪不動沙漸知墟落近林外酒帘斜

宛南

穉柳閒柔桑春行消水陽暖風薰蛺蝶輕浪浴鴛鴦草映征  
人轡花明浣女璫宛南多古思臨眺意何長

南陽

陳寶雞初應參墟鳳已翔星連諸將位雲起貴人鄉睿略符  
高祖宗英啟後王獨憐魚水會龍氣草廬荒

曉發

首路已旬日勞勞客子車長天初落月高嶺漸生霞雉離田  
中麥鶯啼消曲花風光競妍媚能不眷春華

自襄城達裕州

輪鞅遂經月栖栖勞者歌夢懸京國遠山入楚天多永路羈  
禽滯徂年隙駟過塵纓安事此歸濯漢江波



百柱堂全集卷十終